

Awor Felipe a **buska i haña** Natanaèl i a bis'é: "Nos a haña **Esun di Kende Moisés** a skirbi den e **Lei i di Kende e Profetanan** tambe a skirbi. Ta **Hesus di Nazarèt**, yu di Hosé." (**Juan 1:45**).

E ora ei **Dios** a bisa: "Laga tin **Lus**." I tabatin **Lus**. I **Dios** a mira ku e **Lus** tabata bon, i **Dios** a separá e **Lus** for di e **skuridat**. I **Dios** a yama e **Lus Dia** i e **skuridat El** a yama **Nochi**. I tabata atardi i tabata mainta: e promé dia. (**Génesis 1:3-5**).

Asina **Moisés** a ekstendé su man na shelu, i tres dia largu tabatin un **skuridat** profundo na henter tera di Egipto. Nan no tabata mira otro, ni ningun hende no a lanta for di su lugá pa tres dia, ma tur **yu di Israel** sí tabatin **Lus** den nan lugánan di biba. (**Eksodo 10:22-23**).

I di dia **SEÑOR** tabata bai nan dilanti den un **Pilar di nubia** pa guia nan riba kaminda, i anochi den un **Pilar di Kandela** pa duna nan **Lus**, pa nan por a biaha di dia i anochi. Di dia E no tabata kita e **Pilar di nubia**, ni anochi e **Pilar di kandela**, for di dilanti di e pueblo. (**Eksodo 13:21-22**).

Despues Mardoqueo a sali for di presensia di rei na paña real, blou i blanku, ku un korona grandi di oro i un paña di lino fini i púrpura; i e stat Susa tabata grita i regosihá. Pa e hudiunan tabatin **Lus i Alegria, Goso i Honor** (**Esther 8:15-16**).

O manda **Bo Lus** i **Bo Bèrdat**, laga nan guia mi; laga nan trese mi na **Bo seru santu** i na **Bo lugánan di biba** (**Salmo 43:3**).

Ta **E** ta **Esun** ku ta revelá e kosnan profundo i skondí; **E** sa kiko tin den **skuridat**, i **E Lus** ta biba serka **DJE**. (**Daniel 2:22**).

E **skuridat** di kual ta wòrdu menshoná aki den e **Lei i e Profetanan** ta di e **diabel**, ku tabata un **Arkangel** serka **Dios Tata**. Ta dor di su **arrogansia, yalursheit, idolatria, hostilidat, odiamentu, gañamentu, desakuerto, falsedat, envidia** ku **Dios Tata** a kita su posishon for di dje i sake for di **Reino Selestial**.

E **Lus** ta di kual ta wòrdu menshoná aki den e **Lei i e Profetanan** ta di **Esun di Kende Moisés** a skirbi: **Yeshua, Esun Ungi**, di **Dios Tata**. E **Lus** ta loke ta trese **amor, goso, pas, pasenshi, kariño, bondat, fieldat, masedumbre, dominio propio**. **Dios Tata** no a manda e **Lus** na **mundu** pa kondena sino pa **Restourá, Renová i Redimí** loke **skuridat** a hasi i ta hasiendo. E **Lus** ta pa **nos benefisio, nos progreso i nos adelanto**.

E **Lus** ta nos **Viktoria** kontra **skuridat**. Boso ta di **Dios**, yu chikitu nan, i boso a **vense nan**; pasobra **mas grandi ta Esun** ku ta den boso ku esun ku ta den **mundu**. Nan ta di **mundu**; pesei nan ta papia di **mundu**, i **mundu** ta skucha nan. **Nos ta di Dios; esun ku konosé Dios ta skucha nos**; esun ku no ta di **Dios** no ta skucha nos. Na esaki nos ta **konosé e Spiritu di Bèrdat** i e spiritu di eror. (**1 Juan 4:4-6**).

E **Lus** ta nos **Viktoria** kontra **skuridat**. Si un hende bisa: "**Mi ta stima Dios**," i ta **odia** su ruman, e ta un **gañadó**; pasobra esun ku no ta **stima** su ruman ku el a mira, no por **stima Dios, Kende e no a mira** (**1 Juan 4:20**).

9 febrüari 2018

Sea Bendishoná den e Amor di Yeshua Mesias

Rev. Remsly L Riley